

Bilten

Mart 2025.
Izdanje br. 37

Općinskog suda u Sarajevu



Općinski sud u Sarajevu
Opštinski sud у Сарајеву
Sarajevo Municipal Court

Održan sastanak sa predstavnicima Švedske agencije za izvršenja

U sklopu ICEA III projekta za unapređenje izvršnog postupka 15. januara 2025. godine održan je radni sastanak predstavnika Općinskog suda u Sarajevu sa predstavnicima Švedske agencije za izvršenja te Visokog sudskog i tužilačkog vijeća Bosne i Hercegovine. Sastanak je održan u prostorijama suda, a na istom je prezentovan niz projekata Općinskog suda u Sarajevu koji su do sada uspješno realizovani, sa ciljem unapređenja izvršnog postupka i povećanja naplate u pokrenutim predmetima pred ovim sudom.


Predstavnici Općinskog suda u Sarajevu istakli su da je u proteklom periodu uspostavljen jedinstven „Call centar“ za podršku građanima u slučaju pokrenutog izvršnog postupka, gdje građani vrlo jednostavno putem agenata tog Centra mogu dobiti sve neophodne informacije i instrukcije za izmirenje dugovanja u izvršnim predmetima na najkraći način, a zbog izvanrednih rezultata samog Centra i odaziva građana planirano je i proširivanje kanala komunikacije u narednom periodu gdje je u pripremi aplikacija za online pristup komunikaciji sa agentima Centra.

Kako je prepoznata potreba za efikasnije pristupanje rješavanju izvršnih predmeta i naplati dugovanja, naglašeno je da su kapaciteti Odsjeka sudskih izvršitelja u prethodnom periodu znatno ojačani raspisivanjem i uspješnom provedbom konkursne procedure za upošljavanje 10 novih sudskih izvršitelja te je planirano jačanje kapaciteta „Call centra“ koji već u dosadašnjem radu bilježi kvalitetne rezultate i pozitivnu kritiku građana. Osim uspostavljenog „Call centra“, planirano



▲ Detalji sa održanog sastanka

je i osposobljavanje potpuno novog „Aukcijskog centra za prodaju pokretnih stvari“. Trenutno se traže najpovoljnija rješenja za uspostavljanje „Aukcijskog centra za prodaju pokretnih stvari“, uz podršku partnera projekta. Održani sastanak predstavnika Općinskog suda u Sarajevu uz podršku IKT Odjeljenja sa članovima projektnog tima Švedske agencije za izvršenja je rezultirao uspostavljanjem jedinstvene baze podataka za potrebe i neometano funkcionisanje novih jedinica unutar Odsjeka sudskih izvršitelja, shodno proširenim radnim kapacitetima, a što predstavlja finalni korak prema potpunoj digitalizaciji radnih procesa u ovom odjeljenju i efikasnijem izvršnom postupku.



Pored navedenog, planiran je dodatni niz aktivnosti među kojima vrijedi istaći održavanje planskih sastanaka sa predstavnicima komunalnih preduzeća, a sa ciljem aktivnijeg učešća u izvršnom postupku, kao i nabavka adekvatnog vozila za organizovano postupanje sudskih izvršitelja na terenu.

Predstavnici Švedske agencije za izvršenja kao i predstavnici Visokog sudskog i tužilačkog vijeća Bosne i Hercegovine su prepoznali i pozdravili timski rad i dosadašnje rezultate, ali i napore koje je Općinski sud u Sarajevu uložio kao pionir pri unapređenju efikasnosti Izvršnog postupka putem inovativnih i jedinstvenih rješenja koja su u proteklom periodu usvojena. ■

Održan sastanak sa predstavnicima Vijeća stranih investitora na temu rada Zk ureda

U prostorijama Općinskog suda u Sarajevu 5. februara 2025. godine održan je sastanak sa predstavnicima Vijeća stranih investitora. Tema sastanka bila je zakonska regulativa, rad Zemljišnoknjižnog ureda Općinskog suda u Sarajevu te utjecaj istog na pravnu sigurnost, s posebnim naglaskom na strane investitore.

Tokom sastanka ponovljeno je da se u zemljišnoj knjizi, kao javnom registru, mogu upisivati zabilježbe koje imaju informativni karakter, a u skladu sa Zakonom o zemljišnim knjigama F BiH. Upis zabilježbi vrši se na prijedlog stranke ili po odluci suda, dok Zemljišnoknjižni ured nema ovlaštenje da odbije za primanje prijedloga, čak ni u slučaju kada su isti očigledno neosnovani. Svaki prijedlog dodjeljuje se u rad zemljišnoknjižnom referentu sistemskom dodjelom na odlučivanje. Već duže vrijeme Zk ured je ažuran i po prijedlozima postupa u veoma kratkim rokovima, u pravilu od dva

do tri dana, te donosi odluke koje dostavlja podnosiocima prijedloga i zemljišnoknjižnim titularima prava. Na te odluke stranke imaju pravo žalbe, a o kojoj odlučuje Kantonalni sud u Sarajevu, te se u tom slučaju pravosnažnost odluke Zk ureda odgađa do odluke žalbenog suda.

Predstavnici Vijeća iskazali su zabrinutost zbog nedavnih objava u javnosti, a na temu tzv. „prljanja“ zemljišnoknjižnih izvadaka prema kojima se kroz procesne manipulacije ili neutemeljene tužbe pokušavaju izdejsstvovati zabilježbe u zemljišnoj knjizi. Na ovo je odgovoreno da prema službenoj evidenciji i zapažanjima Zk ureda ta praksa nije raširena i učestala, odnosno primijećena je u relaciji određenog malog broja subjekata te zapravo ne predstavlja ozbiljan pravni rizik, a u potpunosti bi izgubila značaj u situaciji postojanja brzog odgovora pravosuđa jer pravosnažno presuđenje omogućava brisanje svih pravosnažno riješenih prijedloga,

što osigurava da zemljišnoknjižni izvadak bude ažuriran i bez pravno beznačajnih evidencija.

Na kraju sastanka zaključeno je da će tržište nekretnina biti stabilnije i sigurnije ukoliko se minimaliziraju mogućnosti zloupotreba te se očekuje da će zakonodavne promjene u budućnosti dodatno unaprijediti pravnu sigurnost. Ured će nastaviti postupati brzo i efikasno, u skladu sa zakonskim okvirom, s ciljem jačanja povjerenja u zemljišnu knjigu.

Ispred Općinskog suda u Sarajevu sastanku su prisustvovali Damir Batotić, predsjednik Općinskog suda u Sarajevu, sudija Ramiza Aganović, predsjednica Odjeljenja registra za upis pravnih lica, Vildana Fajić Poturović, zk sudija, te Ekrem Tošić, šef Zk ureda.

Predstavnici Vijeća stranih investitora bili su Sanela Karić, predsjednica upravnog odbora Vijeća stranih investitora, te advokat Armin Hadžić. ■



▲ Šalter-sala Zk ureda



Održan redovni godišnji sastanak sa predstavnicima Notarske komore FBiH

S ciljem analize rezultata rada u prethodnoj godini te jačanja i unapređenja međusobne saradnje, 19. februara 2025. godine organizovan je sastanak predstavnika Notarske komore F BiH i Općinskog suda u Sarajevu. Sastanak je održan u Ka-

binetu predsjednika Suda, a prisutni su razgovarali o aktuelnim temama koje su od značaja kako za Sud, tako i za Notarsku komoru FBiH. Poseban akcenat je stavljen na brzinu rješavanja ostavinskih predmeta po kojima postupaju notari

kao povjerenici suda, kao i na smanjenje administrativnih prepreka sa kojima se susreću u radu.

Ispred Općinskog suda u Sarajevu sastanku su prisustvovali Damir Batotić, predsjednik suda, sudija Jasmina Aljičević, predsjednica Vanparničnog odjeljenja, sudija Ramiza Aganović, predsjednica Odjeljenja registra za upis pravnih lica, Sumeja Buko, šefica Kabineta, Ekrem Tošić, šef Zk ureda te Muris Lončarević, šef Odsjeka za upravljanje predmetima.

Kao predstavnici Notarske komore sastanku su prisustvovali notarka Nerminka Hamidović, predsjednica Notarske komore FBiH, notar Bojan Marković, koordinatorski saradnik Podružnice Sarajevo te Hejdi Petrović, rukovoditeljica Stručne službe. ■



▲ Predstavnici Notarske komore FBiH

Sistem online registracije poslovnih subjekata u FBiH

Dana 10.01.2025. godine, federalni ministar pravde Vedran Škobić održao je radni sastanak s predstavnicom Grupacije Svjetske banke u Bosni i Hercegovini (IFC) Senkom Eminagić Vranić, sutkinjom Općinskog suda u Sarajevu Ramizom Aganović i sutkinjom Općinskog suda u Travniku Halisom Bašagić, na kojem je razmatrano stanje funkcionalnosti probnog Sistema online registracije poslovnih subjekata u Federaciji Bosne i Hercegovine.

Obzirom da su Općinski su u Sarajevu i Općinski sud u Travniku pilot sudovi u kojima je uspostavljen probni Sistem online registracije poslovnih subjekata u Federaciji Bosne i Hercegovine, razgovarano je o unaprjeđenju probnog Sistema i otklanjanju trenutnih poteškoća u njegovoj funkcionalnosti i radu sudija. Predstavnica Općinskog suda u Sa-



rajevu istakla je da je tokom 2024. godine, u Općinskom sudu u Sarajevu izvršena registracije 680 novih poslovnih subjekata te da je registracija izvršena u roku od 24 sata, čime su ispunjeni standardi koje je postavila Svjetska banka i čime će se značajno podići rejting Bosne i Hercegovine na Listi Svjetske banke o lakoći poslovanja. Zaključeno je da je pojedina teh-

nička rješenja i propisane obrasce potrebno unaprijediti te provesti dodatnu edukaciju nositelja pravosudnih funkcija, advokata i zainteresovanih građana.

U narednom mjesecu očekuje se puna funkcionalnost Sistema u pilot sudovima, nakon čega će Sistem biti uspostavljen i u preostalim osam registracijskih sudova u Federaciji Bosne i Hercegovine. ■

Vijest preuzeta sa portala Federalnog ministarstva pravde

<https://www.fmp.gov.ba/bs/news-reader/sustav-online-registracije-poslovnih-subjekata-u-federaciji-bosne-i-hercegovine.html>

Osam pripravnika uspješno obavilo pripravnički staž

Općinski sud u Sarajevu je tokom 2023. i 2024. godine kontinuirano i u saradnji sa Ministarstvom pravde i uprave Kantona Sarajevo pružio podršku mladim ljudima, bachelorima prava, da putem stručnog osposobljavanja i obavljanja pripravničkog staža upoznaju organizacionu strukturu i način rada jednog od najvećih sudova u Bosni i Hercegovini i regionu te steknu osnovna praktična znanja, koja će im omogućiti lakše zapošljavanje i polaganje pravosudnog ispita.

U navedenom periodu pripravnici su imali priliku da na osnovu Programa obuke sudskih pripravnika u Općinskom sudu u Sarajevu upoznaju rad u svim sudskim odjeljenjima, pisarnicama suda i poslove



Zemljišnoknjižnog ureda, te da se dodatno educiraju u Centru za edukaciju sudija i tužilaca. Našim mladim kolegama želimo puno sreće i uspjeha u budućem životu i radu. ■

Novoimenovane sudije stupile na dužnost 06.01.2025. godine

Sastanak sa novoimenovanim sudijama Općinskog suda u Sarajevu održan je u biblioteci suda 06. januara 2025. godine. Denis Kurtović, zamjenik predsjednika suda, pozdravio je prisutne sudije te im poželio uspjeh u budućem radu. Ukratko ih je informisao o organizaciji rada suda i sudskih odjeljenja te ih obavijestio na kojim će referatima raditi.

Na sjednici Visokog sudskog i tužilačko vijeće BiH koja je održana 16. i 17. oktobra 2024. godine imenovano je 15 sudija Općinskog suda u Sarajevu i to:

- Anel Trumić,
- Melisa Bandić,
- Mirsada Karahmetović,
- Ana Sotirov,
- Bojana Miralem,
- Kenad Osmanović,
- Sanida Vahida-Ramić,
- Nina Šeremet,



- Slobodanka Gajić,
- Haris Demirović,
- Nataša Lalović,
- Vildana Abaz Hadžić,
- Nađa Rekanović Topčagić,
- Snježana Komadan,
- Azra Mejrušić.

Pri donošenju Odluke o imenovanju, VSTV BiH je uzeo u obzir kriterije poput: stručnog znanja, radnog iskustva i radnih rezultata; stručne sposobnosti zasnovane na dosadašnjim rezultatima u karijeri;

sposobnosti da nepristrano, savjesno, marljivo, odlučno i odgovorno obnaša dužnosti u okviru funkcije za koju se prijavljuje; odnosa sa radnim kolegama, ponašanja van posla, profesionalne nepristranosti. Pri imenovanju, VSTV BiH primjenjuje odgovarajuće ustavne odredbe kojima se uređuju jednaka prava i zastupljenost konstitutivnih naroda i ostalih, te poštuje ravnomjernu zastupljenost spolova. ■

Svečano obilježena 21. godišnjica Općinskog suda u Sarajevu



Uz prisustvo velikog broja uposlenika Općinskog suda u Sarajevu, 13. decembra 2024. godine u hotelu Holiday svečano je obilježena 21. godišnjica Općinskog suda u Sarajevu.

Damir Batotić, predsjednik Općinskog suda u Sarajevu, kratko se obratio prisutnima istakavši da je tokom 2024. godine mnogo projekata realizovano u sudu, mnogo predmeta riješeno, a što je rezultat zajedničkog rada i zalaganja svih uposlenika. Predsjednik se zahvalio prisutnima i na velikom odazivu jer je ove godine svečanoj proslavi Dana suda prisustvovalo preko 240 uposlenika.



Općinski sud u Sarajevu formiran je 15.12.2003. godine spajanjem sarajevskog Općinskog suda I i II te spajanjem devet općinskih suda-

va za prekršaje. Po broju uposlenika jedan je od najvećih sudova u regiji. ■



▲ Detalji sa održanog sastanka u Kabinetu predsjednika suda

Održan redovni, godišnji sastanak predsjednika Kantonalnog i Općinskog suda u Sarajevu



Vladimir Špoljarić, predsjednik Kantonalnog suda u Sarajevu, posjetio je Općinski sud u Sarajevu 27. decembra 2024. godine. Riječ je o redovnom godišnjem sastanku koji je propisan članom 9. Pravilnika o unutrašnjem sudskom poslo-

vanju - da predsjednici viših sudova, prema potrebi, a najmanje dva puta godišnje, održavaju sastanke s predsjednicima nižestepenih sudova u okviru svoje nadležnosti.

Damir Batotić, predsjednik Općinskog suda u Sarajevu, predstavio

je rezultate rada suda za proteklih 11 mjeseci kao i realizaciju planova rješavanja starih predmeta. Predstavljen je i podatak o broju koruptivnih predmeta koji se vode na ovome sudu te efikasnost rješavanja predmeta iz oblasti koruptivnih krivičnih djela.

Na sastanku se govorilo i o ažurnosti sudskih odjeljenja, kvalitetu sudskih odluka, zastarama kao i o transparentnosti u radu suda, a koja je u proteklih dvije godine znatno poboljšana. Osim predsjednika navedenih sudova, sastanku su prisustvovali i Mediha Gagrica, pomoćnica predsjednika Kantonalnog suda u Sarajevu te Muris Lončarević, šef Odsjeka za upravljanje predmetima Općinskog suda u Sarajevu. ■



▲ Vladimir Špoljarić, predsjednik Kantonalnog suda u Sarajevu i Mediha Gagrica, pomoćnica predsjednika

Edukacija za pripravnike - Praktična znanja kao temelj za buduće izazove u pravosuđu

S ciljem osnaživanja budućih nosilaca pravosudnih funkcija, Odjel za unapređenje efikasnosti i kvalitete rada u sudovima Sekretarijata VSTV BiH, u saradnji sa Centrom za edukaciju sudija i tužilaca Federacije BiH (CEST F BiH), organizovao je drugu po redu edukaciju za pripravnike. Održana 19. novembra 2024. godine, ova edukacija nastavak je prethodnog modula posvećenog parničnom postupku, dodatno obogaćenog segmentima izvršnog postupka. Fokus je bio na osnaživanju



razumijevanja ovih ključnih pravosudnih procesa koji predstavljaju temelje pravne zaštite i garanciju pravne sigurnosti.

Kroz interaktivne vježbe i simulaciju suđenja, pripravnici su imali priliku da teorijska znanja primijene u stvarnim situacijama razvijajući vještine pregovaranja, argumentacije i donošenja odluka, suočavajući se s izazovima koje nosi sudska praksa. Ovakav pristup omogućio im je da obogate svoje iskustvo i pripreme se za buduće profesionalne zadatke.

Edukatori su pružili detaljan pregled procedura i izazova izvršnog postupka, naglašavajući njegov značaj kao krune sudskog procesa. Kroz konstruktivnu diskusiju i razmjenu iskustava, učesnici su produbili svoje razumijevanje ovog segmenta pravosuđa, shvaćajući važnost efikasnog sprovođenja sudskih odluka za održavanje vladavine prava.

Edukacija je potvrdila značaj kontinuiranog profesionalnog razvoja mladih pravnikâ. Kroz aktivno učešće i interakciju sa iskusnim stručnjacima, pripravnici su unaprijedili svoje vještine i stekli dragocjene uvide u dinamiku sudskih procesa. ■



Uspješno realizovan projekat uvezivanja Zemljišnoknjižnog ureda Općinskog suda u Sarajevu sa centralnim serverom E-grunta u Federalnom ministarstvu pravde

Općinski sud u Sarajevu odnedavno je uspostavio stalnu vezu sa centralnim serverom E-grunta u Federalnom ministarstvu pravde. Obzirom na složenu organizaciju sudskih odjeljenja i rasporeda kancelarija, isto nije bilo moguće uraditi ranije. Reorganizacijom te smještanjem ZK refrenata u jedno krilo zgrade Suda kao i postavljanjem posebne mrežne infrastrukture, ZK ured je segmentiran u zasebnu mrežu te je uspostavljen VPN pristup prema Federalnom ministarstvu pravde. Ranije su podaci prebacivani manuelno, uz kašnjenje od nekoliko dana, te iz tog razloga isti nisu bili 100% ažurni na javnom portalu



E-grunt.ba. Nakon ovog projekta uvezivanja, podaci na portalu E-grunt.ba su ažurni u stvarnom vremenu, sa napomenom da prikazani podaci zemljišnoknjižnog uloška imaju is-

ključivo informativni karakter i ne smatraju se službenim dokumentom. Za zvanične zemljišnoknjižne izvatke ipak je potrebno obratiti se nadležnom Zemljišnoknjižnom uredu. ■

Nastavlja se realizacija studentske prakse u Općinskom sudu u Sarajevu

U prostorijama Pravnog fakulteta Univerziteta u Sarajevu 17. oktobra 2024. godine održan je sastanak koordinatora Okvirnog sporazuma za studentske prakse, s ciljem uspješne realizacije praksi u akademskoj 2024./2025. godini. Sastanak je održan na inicijativu Nacionalnog centra za državne sudove (NCSC) koji nastavlja i ove godine s organizacijom stručnih studentskih praksi u saradnji sa Pravnim fakultetom u Sarajevu.

Sastanku su ispred Pravnog fakulteta učestvovali prodekan za međunarodnu saradnju, dr. Mirza Hebib te vanredna profesorica, dr. Vildana Pleh. Ispred NCSC Ureda za Bosnu i Hercegovinu prisustvovala je Lejla Hasanović te koordinatori sljedećih pravosudnih institucija: Pravobranilaštva BiH, Općinskog suda u Sarajevu, Kantonalnog tužilaštva KS, Vrhovnog suda FBiH, Ureda disciplinskog tužioca Visokog sudskog i tužilačkog vijeća BiH te Advokatske komore FBiH.

Ovaj sastanak označava važan korak u kontinuiranom



unapređenju praktičnog obrazovanja studenata prava čime se osigurava kvalitetnija priprema za njihovu buduću pravnu karijeru.

Inače, u Općinskom sudu u Sarajevu određeno je devet mentora koji će biti zaduženi za mentorisanje 13 studenata treće i četvrte godine Pravnog fakulteta u Sarajevu, a tokom zimskog semestra akademske 2024./2025. godine. ■



Održan sastanak predstavnika Uprave suda, koordinatora Odsjeka za upravljanje sudskim predmetima te koordinatora Odsjeka za prijepis

U cilju unapređenja procesa rada i uspješnije koordinacije prilikom obavljanja svakodnevnih radnih zadataka, u Multimedijalnoj sali Općinskog suda u Sarajevu 10. oktobra 2024. godine održan je sastanak predstavnika Uprave Suda, koordi-

natora Odsjeka za upravljanje sudskim predmetima te koordinatora Odsjeka za prijepis.

Tema sastanka bili su problemi i pitanja sa kojima se sudska administracija susreće prilikom obavljanja radnih zadataka, te prijedlozi unap-

ređenja rada sudske administracije. Planirano je da se ovakvi sastanci održavaju periodično, a kako bi se doprinijelo unapređenju radnih procesa, sa krajnjim ciljem da se putem bolje i profesionalnije komunikacije stvori povoljnije radno okruženje. ■

Nastavak saradnje Općinskog suda u Sarajevu i Općinskog suda u Goraždu

Predsjednica Općinskog suda u Goraždu Lejla Ferhatović, sudija Muris Tatarin te službenik za IKT Kamil Herenda posjetili su 10. septembra 2024. godine Općinski sud u Sarajevu. Tokom posjete predsjednica Ferhatović obišla je prostorije Općinskog suda u Sarajevu kojom prilikom su predsjednici sudova razmijenili iskustva u vezi sa organizacijom suđenja u krivičnim predmetima te je razgovarano i o drugim tema-



ma koje su od značaja za funkcionisanje sudova. Ova posjeta je nastavak saradnje na nivou sudova

iz 2023. godine, a zaključak je da je ista korisna te da će se nastaviti i u narednom periodu. ■

Predsjednik Špoljarić u posjeti sarajevskom Općinskom sudu

Shodno članu 9. Pravilnika o unutrašnjem sudskom poslovanju kojim je propisano da predsjednici viših sudova, prema potrebi, a najmanje dva puta godišnje, održavaju sastanke s predsjednicima nižestopenih sudova u okviru svoje nadležnosti, 30. avgusta 2024. godine održan je sastanak Vladimira Špoljarića, predsjednika Kantonalnog suda u Sarajevu sa Damirom Batotićem, predsjednikom Općinskog suda u Sarajevu.

Na sastanku koji je održan u Kabinetu predsjednika Batotića, predstavljen je izvještaj o realizaciji Plana rješavanja predmeta ovog suda zaključno sa 30. junom 2024. godi-



ne kao i realizacija Plana rješavanja starih predmeta.

Analiziran je i izvještaj o broju koruptivnih predmeta koji se vode na ovome sudu te predstavljena informacija o pritvorskim predmetima i nadzoru nad pritvorom. Posebna pažnja posvećena je analizi zastara

u krivičnim i prekršajnim predmetima, kvalitetu sudskih odluka kao i najčešćim razlozima ukidanja i preinačavanja odluka ovog suda od strane Kantonalnog suda u Sarajevu.

Sljedeći sastanak je planiran za decembar 2024. godine. ■

Stručni saradnici pravosudnih institucija predstavljali BiH na THEMIS takmičenju

Stručni saradnici pravosudnih institucija, Faris Dizdarević (Općinski sud u Sarajevu), Maida Begtašević (Kantonalni sud u Sarajevu) i Asmira Šuvalija Martinčević (Sud BiH), ove godine predstavljali su Bosnu i Hercegovinu u polufinalu THEMIS takmičenja koje je održano od 16. do 19. jula u Trieru u Njemačkoj.

Pod mentorstvom Alene Kurspačić Nadarević, glavne disciplinske tužiteljice Ureda disciplinskog tužioca, u okviru sekcije Etika i profesionalno ponašanje, predstavili su istraživački rad o temi *“Balansiranje slobode vjeroispovijesti i potrebe održavanja reda i dostojanstva u sudnici.”*

THEMIS takmičenje organizira Evropska mreža za edukaciju pravosuđa „EJTN“ za stručne sarad-



nike/savjetnike koji su zaposleni u pravosudnim institucijama, s ciljem razvijanja i unapređenja vještina rada u timovima te kritičkog razmišljanja s primjerima konkretnih slučajeva. Ove godine takmičilo se 36 timova iz 12 zemalja članica Evropske unije, Moldavije te iz tri zemlje Zapadnog Balkana - Albanije, Srbije te Bosne i

Hercegovine.

Tim iz Bosne i Hercegovine podržao je projekat EU4Justice koji finansira Evropska unija. Projekat ima za cilj usklađivanje pravosudnog sistema BiH s evropskim standardima kroz jačanje nezavisnosti, efektivnosti, odgovornosti i efikasnosti pravosudnog sektora u BiH. ■

Sutkinja Anida Saračević učestvovala u Zimskoj akademiji o pravosudnoj saradnji u vezi sa prekograničnim organizovanim kriminalom

U periodu od 04. do 06.12.2024. godine, Anida Saračević, sutkinja Krivičnog odjeljenja Općinskog suda u Sarajevu, učestvovala je u Zimskoj akademiji o pravosudnoj saradnji u vezi sa prekograničnim organizovanim kriminalom (Winter Academy on Judicial Cooperation in Cross-Border Organised Crime). Akademija je organizovana od strane Projekta krivičnog pravosuđa u zemljama Zapadnog Balkana, a održana u njemačkom gradu Trieru. Učesnici akademije imali su mogućnost steći dodatna znanja na temu saradnje između država u predmetima prekograničnog kriminala, zaštite ljudskih prava u takvim predmetima, načinu prikupljanja i zakonitosti dokaza pribavljenih u postupku saradnje između država (dokaza pribavljenih elektronskim putem) te saradnji država u obliku



zajedničkih istražnih timova. Generalni zaključak je da je saradnja između država neophodna te je istaknuto da postoje različiti mehanizmi kojima se ista može unaprijediti, a koji stoje na raspolaganju kako sudijama tako i tužiocima te ih je neophodno više i češće koristiti (naprimjer korištenje Europolu i Eurojusta).

Sutkinja Saračević je uzela aktivno učešće tokom održavanja Akademije, a iskustva koja je stekla će joj svakako biti od velike koristi u budućem radu. Ona je istakla da će u narednom periodu biti ponovo organizovane slične akademije i seminari te je pozvala kolege da se blagovremeno prijave. ■

Nadir Imamović, stručni saradnik Općinskog suda u Sarajevu, učestvovao u snimanju promotivnog spota na temu sudske nagodbe

U okviru Projekta „EU podrška reformama pravosuđa u BiH“, 19.09.2024. godine u sudnici Odjeljenja za sporove malih vrijednosti Ilidža obavljeno je snimanje promotivnog spota na temu sudske nagodbe. Za učešće u ovom spotu izabran je Nadir Imamović, stručni saradnik Općinskog suda u Sarajevu, a koji je tokom „Sedmica sudskih nagodbi“ u periodu od 20. do 31.05.2024. godine imao najviše sklopljenih sudskih nagodbi u cijeloj BiH.

Inače, sudska nagodba je brži i jeftiniji način rješavanja sudskog spora koji podrazumijeva međusobni dogovor stranaka u sporu. Ovaj način rješavanja sporova naročito je pogodan u predmetima koji se odnose na naplatu komunalnih i sličnih usluga male vrijednosti, radne sporove, isplatu dugova i naplatu novčanih potraživanja, naknadu štete, podjelu stvari i nekretnina u zajedničkom vlasništvu, uređenje međa, materijalna davanja i drugo. ■



▲ Sudski stručni saradnik Nadir Imamović



Novoimenovani stručni saradnici Općinskog suda u Sarajevu stupili na dužnost 01.07.2024. godine

Damir Batotić, predsjednik Općinskog suda u Sarajevu, održao je u svom Kabinetu 01. jula 2024. godine kraći sastanak sa novoimenovanim stručnim saradnicama Općinskog suda u Sarajevu povodom njihovog stupanja na dužnost. Saradnicama je predstavljen rad suda i sudskih odjeljenja, a predsjednik im je poželio sreću u budućem radu istakavši da je ovaj sud najveći u regiji te je samim tim i velika odgovornost raditi u ovako velikom

kolektivu.

Stručne saradnice Nejla Adilović Halilović, Edisa Brčić, Bedrija Džanko, Kornelija Nikačević i Dženita Slatina bit će raspoređene na Izvršno odjeljenje, Izvršno odjeljenje za rješavanje sporava malih vrijednosti (Ilidža) te Izvršno odjeljenje za rješavanje po vjerodostojnoj ispravi (Grbavica). Sastanku su prisustvovali i predsjednici sudskih odjeljenja na koja su raspoređene stručne saradnice. ■



Održan sastanak sa predstavnicima sudske policije u FBiH

U prostorijama Općinskog suda u Sarajevu 27. juna 2024. godine održan je sastanak Damira Batotića, predsjednika Općinskog suda u Sarajevu, sa Dženadom Grošom, direktorom Sudske policije u FBiH i Mirzom Biberom, načelnikom Centra sudske policije u Kantonu Sarajevo.

Jedna od tema sastanka bila je sigurnosna situacija u Općinskom sudu u Sarajevu. U tom pravcu razmijenjene su informacije koje su od zajedničkog interesa za dobro funkcionisanje obje institucije, a s obzirom da je i Sudska policija korisnik Palate pravde, predsjednik Batotić informisao je prisutne o trenutnim problemima kada je riječ o rekonstrukciji nekadašnjih prostorija Kazneno-popravnog zavoda Sarajevo.



Učesnici sastanka su se usaglasili da su ovakvi sastanci od velike koristi za obje institucije, kako radi razmjene informacija o trenutnim problemima, tako i radi iznalaženja zajedničkih rješenja i jačanja međusobne saradnje. ■



U renoviranoj biblioteci suda održan kolegij predsjednika sudskih odjeljenja

Kolegij predsjednika sudskih odjeljenja Općinskog suda u Sarajevu održan je 25. juna 2024. godine u prostoriji renovirane biblioteke suda. Biblioteka je opremljena savremenom audio i video opremom kao i stručnom literaturom koja je na raspolaganju svim uposlenicima suda, a primarno će se koristiti za edukacije, održavanje sastanaka te za rad sudija i stručnih saradnika po potrebi. Nakon izvršene adaptacije zaključak je da se radi o jednom zaista reprezentativnom, multifunkcionalnom prostoru koji je renoviran neznatnim sredstvima suda, a prema ideji zaposlenika suda koji su i učestvovali u njenoj realizaciji. ■



Nastavlja se saradnja s ciljem skraćivanja trajanja izvršnog postupka i vremena potrebnog za naplatu potraživanja

U organizaciji Odjela za unapređenje efikasnosti i kvalitete rada sudova Sekretarijata VSTV-a BiH, 04. juna 2024. godine upriličena je posjeta Švedske agencije za izvršenje Općinskom sudu u Sarajevu.

Posjetioci su od strane suda predstavljeni rezultati projektnih aktivnosti i saradnje među kojima je i ispunjavanje preduslova za uspostavljanje Call centra za građane. Naime, u Općinskom sudu u Sarajevu u narednom periodu početi će sa radom Call centar uz pomoć kojeg će građanima-dužnicima u izvršnom postupku, koji se ne zateknu na adresi prilikom posjete sudskih izvršitelja, biti omogućeno da kontaktiraju sud, razjasne eventualne nejasnoće ili saznaju na ko-



ji način najlakše da izmire potraživanja.

Ova posjeta dio je aktivnosti unapređenja izvršnog postupka koje VSTV BiH, u saradnji sa međunarodnim partnerom - Švedskom

agencijom za izvršenja, implementira u pilot sudovima u okviru projekta Unapređenja efikasnosti sudova i odgovornosti sudija i tužilaca - ICEA III finansiranog od strane Kraljevine Švedske. ■

Održan redovni godišnji sastanak sa predstavnicima RAK-a Sarajevo



U Multimedijalnoj sali Općinskog suda u Sarajevu 13. maja 2024. godine održan je redovni godišnji sastanak predstavnika Općinskog suda u Sarajevu i Regionalne advokatske komore Sarajevo. Sastanak je održan s ciljem unapređenja postojeće saradnje kao i utvrđivanja eventualnih problema u radu te načina prevazilaženja istih.

Na sastanku se razgovaralo o radu i postupanju Odjeljenja registra za upis pravnih lica i Zk ureda po zahtjevima advokata kao i o isplati advokata po službenoj dužnosti. Predstavnici RAK-a su posebno pohvalili inicijativu pred-



sjednika Batotića kada je riječ o uspostavljanju šaltera BH Pošte u Auli suda i prodaji sudske takse, a što će advokatima ubuduće uveliko olakšati rad.

Po završetku sastanka konstatova-

no je i da ovakvi redovni godišnji sastanci uveliko doprinose boljoj saradnji suda i RAK-a te su se pokazali kao pozitivan alat za utvrđivanje problema i efikasno rješavanje istih. ■



Formirati posebne timove za komunikaciju u pravosuđu

Efikasni odnosi s medijima su ključni za proces jačanja transparentnosti u radu pravosuđa. Novinarima nisu dovoljni samo glasnogovornici pravosudnih institucija kao sagovornici, već su njima, s ciljem efikasnije komunikacije, potrebni i tužitelji i sudije. S druge strane, pravosudne institucije od medija očekuju više razumijevanja za njihov rad, istaknuto je na panel diskusiji koja je održana u četvrtak (30.05.2024.) u Sarajevu, sa svrhom da istraži odnos između medija i pravosuđa u Bosni i Hercegovini (BiH).

Primarni cilj organizacije ove panel diskusije bio je unapređenje komunikacije i saradnje na relaciji mediji – pravosuđe u BiH, posebno u predmetima korupcije i organizovanog kriminala. Nakon diskusije, predloženo je da veće pravosudne institucije formiraju posebne timove za komunikaciju, s ciljem da se medijima osiguraju pravovremene i adekvatne in-

formacije.

S druge strane, predstavnici pravosudne zajednice u BiH ukazali su na izazove u komunikaciji i saradnji sa medijima, zbog prirode njihovog rada, gdje je novinarima informacija potrebna u kratkom roku. Ovom prilikom je ukazano na neophodnost razumijevanja prirode rada pravosudnih institucija, posebno u ranim fazama u radu na predmetima u tužilaštvima, kako se ne bi ugrozila istraga.

Ovu panel diskusiju organizirao je USAID-ov projekt Pravosuđe protiv korupcije BiH (Projekt) u saradnji sa Udruženjem glasnogovornika tužilaštava u BiH i centrima za edukaciju sudija i tužilaca Federacije BiH i Republike Srpske. Projekt podržava partnerske sudove i tužilaštva u jačanju kapaciteta za efikasan rad na predmetima korupcije i organizovanog kriminala visokog nivoa, kao i u jačanju integriteta i transparentnosti u radu. ■



U posjeti Agenciji za izvršenje Švedske – razmjena iskustava s ciljem efikasnijeg postupanja u izvršnom postupku

Predstavnici sudova iz Sarajeva, Zenice, Tuzle, Travnika, Mostara, Bijeljine i Banja Luke bili su u posjeti Agenciji za izvršenje Švedske s ciljem razmjene praksi u oblasti izvršnog postupka. Riječ je o prvostepenim sudovima koji su dio aktivnosti koje VSTV BiH realizuje s ciljem unapređenja izvršnog postupka, a primarni fokus posjete bio je iznalaženje mehanizama za uspostavljanje održivosti postignutih rezultata i razmatranje metoda za implementaciju pozitivnih promjena u sve sudove u BiH.

Predstavnici sudova imali su priliku upoznati se s načinom rada Agencije kroz primjenu preventivnih mjera za unapređenje rada na izvršnim predmetima te prednostima planske i adekvatne komunikacije sa tražiocima izvršenja, a posebno je prezentiran i način provedbe edukacije izvršitelja u Švedskoj i bitnost kontinuiranog napredovanja i usavršavanja izvršioca.

Sudovima je predstavljen i pregled svih dokumenata koji su izrađeni u okviru saradnje sa sudovima



i Agencijom, a koji će predstavljati priručnik za sudove u nastavku implementacije aktivnosti i preporuka u domenu unapređenja ove oblasti u bh. pravosudnom sistemu.

Sekretarijat VSTV BiH uz podršku Vlade Švedske implementira aktivnosti u sudovima u okviru Projekta unapređenja efikasnosti sudova i odgovornosti sudija i tužilaca u BiH s ciljem unapređenja radnih procesa u okviru izvršnog postupka u BiH, a kroz primjenu metodo-

logije rada Agencije na rad izvršnih odjeljenja sudova.

Razmjena pozitivnih praksi veoma je značajan segment u cjelokupnom procesu unapređenja radnih procesa za efikasniji izvršni postupak, a ovo je samo jedna u nizu koju je Sekretarijat VSTV-a BiH organizovao s ciljem unapređenja efikasnosti i kvaliteta rada u pravosudnim institucijama. ■





Općinski sud u Sarajevu

Protok predmeta u 2024. godini

Vrsta predmeta	Broj neriješenih predmeta na početku perioda I	Broj primljenih predmeta tokom izvještajnog perioda II	Ukupan broj svih predmeta u radu III = I+II	Broj predmeta koji su riješeni u izvještajnom periodu IV	Broj neriješenih predmeta V = III-IV
----------------	---	---	--	---	---

Parnično odjeljenje - (30 sudija) - prosjek 158 predmeta po referatu

P	4.050	3.833	7.883	4.250	3.633
Radni	1.537	1.017	2.554	1.460	1.094
Ukupno	5.587	4.850	10.437	5.710	4.727

Porodično odjeljenje - (3 sudija) - prosjek 331 predmeta po referatu

P-Mo	21	27	48	36	12
Porodični	836	1.245	2.081	1.100	981
Ukupno	857	1.272	2.129	1.136	993

Privredno odjeljenje - (8 sudija) - prosjek 171 predmeta po referatu

Ps	1.012	1.122	2.134	1.012	1.122
L	141	190	331	213	118
St	133	92	225	95	130
Ukupno	1.286	1.404	2.690	1.320	1.370

Krivično odjeljenje - (12 sudija) - prosjek 132 predmeta po referatu

K-K	666	1011	1.677	894	783
K-Kpp	102	4210	4.312	4208	104
K-Kps	641	1203	1.844	1221	623
K-Kv	81	1970	2.051	1992	59
K-Mpom	2	3	5	3	2
Km-Km	7	33	40	29	11
Km-Kmv	1	67	68	66	2
Ukupno	1.500	8.497	9.997	8.413	1.584

Pr-Pr	64	1	65	65	0
-------	----	---	----	----	---

IKS	119	323	442	322	120
-----	-----	-----	-----	-----	-----

Izvršno odjeljenje - "I - Ip" - (22 sudija - 2str.sar.) - prosjek 627 predmeta po referatu

I	6.541	6.619	13.160	6.997	6.163
Ip	1.093	1.251	2.344	1.255	1.089
POM	32	11	43	24	19
I-kom	1.022	221	1.243	505	738
Ip-kom	86	23	109	40	69
Mal-I-Ip	7.869	5.316	13.185	6.213	6.972
Ukupno	16.643	13.441	30.084	15.034	15.050

Vanparnično odjeljenje - (4 sudija + 3 str. sar.) - prosjek V 146 predmeta po referatu

V	885	1.733	2.618	2.033	585
O	6.339	6.463	12.802	6.686	6.116
Ostalo*	4	1	5	5	0
Ukupno	7.228	8.197	15.425	8.724	6.701

Prekršajno odjeljenje opšta nadležnost - (8 sudija) - prosjek 1.610 po referatu

Pr	5.334	16.823	22.157	9.388	12.769
ZM	0	279	279	279	0
Pls	1.114	360	1.474	1.356	118
Ukupno	6.448	17.462	23.910	11.023	12.887

Prekršajno odjeljenje inspekcijski nadzor - (5 sudija) - prosjek 967 po referatu

Pr	2.467	5.635	8.102	3.324	4.778
ZM	0	159	159	159	0
Pls	1.202	178	1.380	1.322	58
Ukupno	3.669	5.972	9.641	4.805	4.836

Ukupno Pr	7.801	22.458	30.259	12.712	17.547
Ukupno ZM	0	438	438	438	0
Ukupno Pls	2.316	538	2.854	2.678	176
Ukupno	10.117	23.435	33.552	15.828	17.723

Registar - (4 sudije) - prosjek 158 predmeta po referatu

Registracija poslovnih subjekata	602	5.640	6.242	5.610	632
----------------------------------	-----	-------	-------	-------	-----

Zk referat - (26 referenata) - prosjek 24 predmeta po referatu

ZK predmeti	595	33.144	33.739	33.099	640
-------------	-----	--------	--------	--------	-----

Odjeljenje za sporove male vrijednosti - (15 str.sar.) - prosjek 5.401

Mal-kom	55.992	16.261	72.253	13.765	58.488
Mal	9.034	3.225	12.259	4.094	8.165
Mals-kom	8.178	3.020	11.198	1.540	9.658
Mals	4.684	2.264	6.948	2.233	4.715
POM	4	3	7	5	2
Ukupno	77.892	24.773	102.665	21.637	81.028

Izvršno odjeljenje po vjerodostojnim ispravama (7 str.sar.) prosjek 121.897/ref.

I	893.037	61.687	954.724	137.608	817.116
Ip	42.911	2.683	45.594	9.000	36.594
Ostalo*	0	0	0	0	0
Ukupno	935.948	64.370	1.000.318	146.608	853.710

Ukupno	1.058.374	189.346	1.247.720	263.441	984.278
---------------	------------------	----------------	------------------	----------------	----------------

Ostvarena norma po odjeljenjima:

Odjeljenje	Norma
Parnično	102,86%
Radno	119,22%
Porodično	99,67%
Privredno	137,68%
Krivično	118,50%
Izvršno - "I - Ip"	146,73%
Vanparnično	182,09%
Prekršajno	125,65%
Registracija poslovnih subjekata	199,01%
Odjeljenje za sporove male vrijednosti	136,58%
Izvršno - po vjerodostojnoj ispravi	663,97%
ZK	104,42%
NORMA SUDA	156,21%

2024. godina

OD UKUPNO 984.278 NERJEŠENIH PREDMETA, 934.738 ILI 94,97% ČINE KOMUNALNI PREDMETI, DOK JE 49.540 ILI 5,03% STRUKTURNIH PREDMETA


49.540	Struktura
-15.050	Izvršni - struktura
-17.723	Prekršaji
-640	ZK
-632	Registar
-120	Iks-referat
15.375	1,56% - parnica i krivica

2023. godina

OD UKUPNO 1.058.374 NERJEŠENA PREDMETA, 1.013.840 ILI 95,80 % ČINE KOMUNALNI PREDMETI, DOK JE 44.534 ILI 4,20 % STRUKTURNIH PREDMETA

45.534	Struktura
-16.643	Izvršni - struktura
-10.117	Prekršaji
-595	ZK
-602	Registar
-119	Iks-referat
16.458	1,56% - parnica i krivica

Struktura nerješenih predmeta na dan 31.12.2024. godine



Općinski sud u Sarajevu

